

# Nos morts

## Teofried Giossi-Lutz, Rueras

15.05.1951 - 10.06.1998



Niessegner ha dau, Niessegner ha priu, siu num seigi benedius. Quella expressiun vegn duvrada beinsavens per cuvierer il mal dall'olma, e pilver ei sa far bein, ei sa gidar a purtar la greva crusch, gidar a capir la sort da quest mund.

Il viadi ei buca per tuts tuttina liungs. Per il Teofried eis el staus empau cuorts, memia cuorts tenor nies manegiar e sentir. Ils 10 da zercladur ha il zenn da s. Giachen annunziau la prematura mort d'in car e bien concar-stgaun. La diagnosta dil cancer ei stada

sco ina camegiada ord tschiel aviert, la noda ei ida afuns e tuccau il profund dall'olma. Cuortamein lein nus schar reviver la veta dil car e bien Teofried.

Il Teo, sco el vegneva numnaus da tutts, ei naschius a Rueras ils 15 da matg 1951 sco 10avel affon da Maria Catrina e Gion Antoni Giossi-Berther. El ravugl dalla gronda famiglia eis el carschius si a Rueras, ed era frequen-tau las scolas primaras el vitg natal. El era il pli giuven en famiglia, aschia ha ei tuccau d'emplenir e far las lavurs vacantas. Cun luschezia seregurdava el d'esser staus ad alp si Caschlè e buca meins d'esser staus ina stad fumegl ella Bassa. Empau colligiaus cun la scrinaria dil bab eis el sedecidius d'emprender scrinarie contonschiu cun bravura il diplom da professiun igl october 1970. Dapi lu ha el luvrau sil mistregn ed ei daventaus cumproprie-tari dalla firma Giossi SA. Pliras casas en lenn massiv «Strick» e biars tetgs cumplicai dattan perdetga da sia savi-da supplementara sco lennari.

Ils 4 d'uost 1979 sespusa el cun la giuvna Bernadetta Lutz da Curaglia. Il

Segner ha benediu la giuvna lètg cun treis affons, la Lea, il Toni e la Simona. El era in fetg bien bab e consort, cun tutta carezia haveva el quitaу per els.

El temps liber s'occupava el cun ira per crappa, bein enqual bi toc dat perdetga da sias anfladas conservadas en ina scaffetta. Catschadur era el cun tgierp ed olma, buca in catschadur da carn, na plitost in catschadur che gudeva la natira e surtut la cumpignia. El spitgava magarai vess sil temps da catscha. Schar ils quitaus da fatschenta e serender culs amitgs els cuolms, ni en tegia si Milez, quei fageva bein al Teo. Cun anim e grond plascher sunava el ella grupper da sunacorns suenter esser staus circa 10 onns ella musica instrumentalala. Cun siu saun e bien humor haveva el per propri in tut aparti da delectar e tener si da frestg entiras cumpignias. Aschia lein tener el en buna memoria.

Dapi l'operaziun dil begl tschiec il november 1996 ei il Teofried mai propri sesentius dil meglier e lu duront la catscha 1997 ei semussau ch'il cancer era s'ignivaus e fugava senza retegn. Enteifer fetg cuort temps ha la nauscha malsogna tschuncanau ina giuvna veta plein plans e visiuns pil futur. Pert-

scharts dalla realitat «tgi che ha la veta ha era la mort» ha el saviu serisdar cun sia famiglia, dar buns cusseglis ed admoniziuns avon che serender ella veta perpetna. Per sia famiglia e per nus tuts che cuntruein cul viadi terrester ha il Teo stuiu dar memia baul cumiau da quest mund. La risposta sin la damonda «daco aschi baul?» sa negin rispunder, sulettamein la cardien-tscha ella veta perpetna ei la risposta concreta.

Ils 12 da zercladur ha il zenn grond da s. Vigeli annunziau la sepultura dil car Teofried. Ina baselgia fullanada ha assistiu al survetsch funeral ed ils tuns dils sunacorns han resunau sur fossa aviarta. Stai bein, car Teofried, in di nus sevesein puspei e lu vegn fatg fiasta e stau vinavon da legra cumpignia.

En num da tuts  
Vigeli Giossi

Ms-Betroffene  
brauchen nicht nur Ihr  
Verständnis. Sondern  
auch Ihre Unterstützung.

PC 30-300 000-0

MS-Gesellschaft  
T 01 461 46 00

**MS** MULTIPLE  
SKLEROSE